

Ekh drom gelo ko vesh i diklyas ekh umal, kay ekh gushteras ekhe sapesa marnas pes. O sap vakergya leske:

– Mudar e gushteras, za te ashtav zhivdi me!

A pa o gushteras vakergya leske:

– Ako man mudarsa, ov ka hal tut! Ako mudarsa les, but barvalipe te dav tut. Mo dat si baro, barvalo si i ka dav tut barvalipe.

O phuro pomislingya thay mudargya e sapes. O gushteras vakergya leske:

– Khide shuke kashta, thar yakh. Khide e kashtengoro prahos, thov les ekhe kotoreste. Phande o kotor me menyate. O prahos po harichka ka perel i ka baryol bosilyokos palal kalke tsikne dromestar kato nakhsa, ov te ingelel tut zhi amende. Kato avsa amende nanay te manges nito bakren, nito grasten, a te manges e pekale grastores. Ov te anel tuke but shukaripe thay baht. Ako lesa frolya ili aver chipota o chora te choren tut, te len tuke savoro i te mudaren tut. Ako lesa e grastores te spechelines tut, da meya.

O phuro chuka i kergya. Mangya e pikale grastes. E bareskoro chhavo phuchlya les sar te dolen i shukare chhaya – samodiva. La ulo samodivsko grast. Ov ulo but zoralo i nikon nashtine te pobedinel les. Kava pobedinla e grastes te prandenel lathe. O phuro vakerdya e bareskere chhaveske:

– Saranda dives nanay te des les pani e pikale grastores, a te des les gudlo pani, te des les giv, ta letserina te hal. I saranda mortya te uryaves les.

Kerde kavka i tsidinde o phuro thay e bareskoro chhavo, gele ki umal kay dikhle e shukare chhaya. O phuro izranla ekh trapos, koleste parongya les zhi ko shero. Ale i shukar chhayori thay lakoro grastes, a o pekalo grast izpishtingyas:

– Ala, samodivsko grasta, te maras amen! Ot kana zharava tut?

Shungya o samodivsko grast, phirgya upral i umal, ama nikas na dikhlyas, a shunlas glasos kay vikinlas les. Duyto drom izpishtingya o pekalo grast:

– Ili tu, ili me te achhas! Te maras amen zhi rateste!

Ko trinto drom o samodivsko grast podikhlya natele i dkhlya e pekale grastores. Zadolde te maren pes o pikalo grastoro thay o samodivsko grast. Kato dandelelas o pekalo grastoro, chhinlas mas tar o samodivsko grast, a ov pa chhinlas mortya. But vreme marde pes thay o samodivsko grast mulo.